

四庫全書

史部

欽定四庫全書

史部

滇畧卷二

詳校官編修<sub>臣</sub>曹振鏞

檢討<sub>臣</sub>德生覆勘

總校官庶吉士<sub>臣</sub>倉聖脉

校對官主簿<sub>臣</sub>汪日贊

謄錄監生<sub>臣</sub>王寶唐

欽定四庫全書

史部十一

滇畧

地理類三

都會郡縣之屬

提要

臣等謹案滇畧十卷明謝肇淛撰肇淛有史觴已著錄此書乃其官雲南時所作分為十門一曰版畧志疆域也二曰勝畧志山川也三曰產畧志物產也四曰俗畧志民風也五曰續畧志名宦也六曰獻畧志鄉賢也七曰

事畧志故實也八曰文畧志藝文也九曰夷  
畧志苗種也十曰雜畧志瑣聞也雖大抵本  
圖經舊文稍益以新事然肇溯本文士于記  
誦亦頗博洽故是書引據有徵敘述有法較  
諸家地志體例特為雅潔薛承矩序稱其上  
以搜揚終常璩之所未及下以補辛顯怡李  
京楊慎田汝成諸紀載之漏遺杭世駿道援  
堂集有是書跋亦謂其詳遠畧近博觀而約

取蒼山洱水之壚稱善史焉均非溢詞也乾隆四十三年六月恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

滇畧卷一

明 謝肇淛 撰

版畧

三皇之世地過日表夏商盛時朝者萬國滇雖遠徼  
亦荒服之內臣也自周失其政六合瓜分蠻夷猾夏  
割據雄長始與中華隔絕歷漢唐宋雖或稱臣貢土  
而叛服靡常莫制其命長蛇封豕窟穴二千年矣高

皇帝開天闢地日月重朗金馬碧雞之墟始得與子  
男之列方幅齒遇至於今文運弘開樵蘇熙攘蒸蒸  
上逼鄒魯蓋亘古以來所未有之盛而亦滇萬世之  
奇遇也故列其分合之蹟以及天造建侯之詳俾後  
之人有所攷焉

雲南古梁州域徼外西南夷所居也顓頊建九州其西  
南為梁州禹貢華陽黑水惟梁州其地曰百濮以西  
南有百國名之如鄯闡昆彌句町牂牁之類周武王



伐紂濮人與焉春秋時楚叔熊逃難於濮始屬楚楚  
威王遣莊躋畧地至滇會有秦師道絕遂王之秦通  
五尺道置吏焉漢元狩間彩雲見於南中遣使跡之  
雲南之名始此也是時滇王當羗問漢使曰漢孰與  
我大使者還報天子惡其不遜時白崖有天竺白飯  
王之後仁果者為衆所戴遂冊為滇王治白崖躋世  
乃絕元封二年發巴蜀兵臨滇滇舉國降以為益州  
郡賜王玉印章帝元和二年建學立師後主建興三

年益州渠帥雍闓殺永昌太守與孟獲誘煽諸夷以  
叛丞相亮討平之時仁果十五世孫龍佑那者能撫  
其民號大白子國仍以其地封之賜姓張氏而以呂  
凱為雲南太守晉宋齊梁陳隋廢置不一皆以守令  
治其人酋長世其官不相凌奪唐貞觀末冊龍佑那  
十七代孫張樂進求為首領大將軍時有哀牢夷細  
農邏者耕于蒙之巍山有祥異所居成聚樂進求遂  
遜國而去之自是諸酋分立為六詔而南詔強盛開

元間遂并五詔朝廷遣使冊為雲南王天寶間殺太守張虔陀臣於吐蕃王師討之敗績無何復請內附仍受冊封賜金印後為其臣鄭氏所篡石晉時段氏據之宋建隆三年王全斌既平蜀欲乘勝進取為圖上獻太祖鑒唐之禍以玉斧畫大渡以西曰此外非吾有也段氏遂得世其國元世祖定雲南改為中慶路封宗室梁王居之而段氏居大理不睦構兵皇明洪武十四年遣潁川侯傅友德西平侯沐英伐雲南

諸郡悉平之置雲南布政使司領府二十州三十六縣三十二而羈縻不與焉見之夷畧

雲南府古鄯闡國也楚莊蹻王其地曰滇國漢為益州

為建寧晉為寧州為晉寧隋為昆州唐武德中置雲

南郡後為蒙氏段氏所據元置善闡萬戶府改中慶

路國初改今名領州四縣九昆明縣

附郭漢滇池地隋昆州元置善

州領昆明官渡二縣後併入昆明國朝因之

富民縣

唐西寧黎州烏蠻居之曰黎濃甸元改今

名宜良縣

唐蠻居之曰囉哀籠後置匡州元改今名

羅次縣

古壓磨呂村烏蠻居之元

置羅次州後改為縣晉寧州漢滇池地晉改今名南詔為陽城

隸歸化縣漢安江入為大吳呈貢縣漢以來皆烏白

城曰呈貢元置歲安寧州古滇國螳螂川也漢連然

貢縣國初改今名縣唐改安寧元改為州國

朝因之隸禄豐縣古球埠甸白村宋大理高氏昆陽

州漢隸益州晉隸寧州隋立昆州宋大理高氏三泊

縣古焚猱地有那龍城易門縣漢烏蠻仲磨由男所

後改嵩明州古烏蠻松氏居之曰松磴漢曰長州因

今縣築臺盟蠻曰嵩盟宋段氏改為郡元改

長州又改嵩盟又改為州領楊林邵

甸二縣國朝省縣入州更盟為明

大理府古昆彌國漢封滇王仁果於白崖置葉榆縣隸

益州後改隸永昌或建寧寧州唐為南詔蒙氏所據

曰大禮五代段氏建國曰大理元置大理路國初平

段酋置府焉領州四縣三長官司一太和縣附郭漢葉榆地

亦曰樸榆唐南詔取太和城趙州漢永昌地唐蒙詔改今名元為趙睦

州又於白崖睦立建寧縣隸之即古勃弄地雲南縣

也後省縣入州國初仍為趙州領雲南縣

漢彩雲見南中處也遣使跡之遂置雲南縣

唐為匡州改品甸蒙詔為雲南州元降為縣鄧川州

漢葉榆地唐建備州治大厘城南詔置浪穹縣浪

川睦改德元城元改今名國初隸以浪穹浪穹

六詔之一治曰彌茨唐稱浪劍賓川州漢葉榆地唐蒙氏太和楚

場地也國朝弘治初割太和趙州雲南地置今州雲龍州古雲龍甸元置總管國初置州上官

段氏領之萬厯末以土酋相殺改設流十二關長官司本楚場地因其僻險置司

臨安府古句町國也漢置句町縣屬牂牁郡唐南詔據

之置通海郡段氏為秀山郡後為阿爨部蠻所居元

置阿爨部尋改臨安路國初置府領州四縣四長官司九

建水州附郭唐烏麼蠻地蒙氏城之石屏州漢蠻曰

言林麓也宋阿爨於地掘得石坪聚居阿迷州漢以前蠻

名阿甯訛為阿迷元置阿甯州漢犂郡改沈黎郡唐改黎州蒙氏曰浪曠

華言旱龍也後以與寧酋曰通海縣漢蠻阿赤尼郎地唐蒙氏立通

寧部元置寧海府尋改寧州

海郡元改為縣河西縣唐置西宗州領三縣河西其一也阿楚居之曰休臘元置河西州尋改為

縣唐為嵒獬蠻所居名嵒峨部元置州國初降為縣蒙自縣唐建水地有山

曰目則後訛為蒙自宋為阿楚蠻據元納樓教化王

弄虧容思陀溪處落恐左能安南共九長官司

永昌軍民府古戎州哀牢國也一云身毒九隆氏居之

漢通博南置不韋縣永平間立瀾滄郡尋改永昌郡



唐以後蒙氏段氏代據之皆為永昌府元立金齒宣撫司以西南有金齒夷名之也國初置府立金齒衛後省府改衛為軍民指揮使司嘉靖初復設永昌軍

民府領州一縣二安撫司一長官司二保山縣

附郭漢以

來皆為哀牢不韋縣境國朝嘉靖初設府始置縣以治西有太保山名

騰越州

古越賸地唐置

又改騰衝征緬招討使司國初為指揮使司嘉靖初

置州改永平縣

漢博南縣晉改永平蒙氏為勝鄉郡元置今縣

潞江安撫司

路江甸也亦曰怒江國初設柔遠府後改為司鳳溪長官司

國初施甸長官

司

舊石句訛為  
施句元置司

楚雄府晉以前屬益州邊地後設安州蠻夷築城居之  
名曰威楚蒙氏置銀生節度段氏為富筋睽改白鹿  
郡又為威楚部元改為路國初改設楚雄府領州二

縣五楚雄縣

附郭即安州威楚縣也元置  
威州尋降為縣國初改今名廣通縣古

睽地蒙氏立路  
睽縣元改今名

定遠縣

漢越雋地唐曰西濮州曰髡  
州後沒於蠻曰耐籠元置牟

州尋改定遠  
州後降為縣

定邊縣

唐濮落蠻居之  
南澗元置今縣

硤嘉縣

唐以前夷

獠居之曰虛初元時有大星隕化  
為黑石人異之遂名硤嘉置縣焉

南安州

舊黑蠻  
居地曰摩

芻元置摩芻千戶鎮南州

漢落蠻所居川名欠舍城曰  
雞和蒙氏置石鼓縣又置俗

富郡元置欠舍石鼓二  
千戶後改為鎮南州

曲靖軍民府漢夜郎味縣地也蜀漢置興古郡梁曰西

爨隋置恭州協州唐曰曲州靖州蒙氏為石城郡元初

為磨彌部後改曲靖路國初改為軍民府領州四縣

二南寧縣

附郭即漢味縣唐  
南寧州元改為縣

亦佐縣

漢牂牁郡宛溫  
縣地唐為盤州

諸蠻據之號夜苴部  
訛為亦佐元置縣

霑益州

漢宛溫地唐西平州磨  
彌蠻居之元改霑益

陸涼州

漢平夷縣地晉置平夷郡蒙  
氏號落溫部元改置陸涼州

馬龍州

漢興古  
地唐沒

於蠻名撒匡契喇又為納垢部  
元置納垢千戶所後改馬龍州  
羅雄州晉以前興古唐蠻羅雄者

居之遂以名  
部元置州焉

澂江府古滇池地也漢置俞元縣隋屬昆州唐屬牂州

後沒於蠻為羅伽甸南詔置河陽郡段氏析為三部

元置澂江路國初改為府領州二縣三河陽縣附郭唐廢

步蠻居之南詔置河陽郡  
元改河陽州尋改為縣  
江川縣漢碌雲異城又曰易籠蒙氏徙曲旺

蠻居之段氏曰步雄部  
元改江川州尋降為縣  
陽宗縣唐蠻強宗部居此訛為陽宗元因置縣

新興州漢青蛉弄棟二縣地唐置求州蒙氏為溫富州元曰部傍曰普舍曰研和曰休納後置新

興路南州

唐昆州地夷名路甸後為落蒙蠻所據元置萬戶府後改路南州

蒙化府唐以前為白國與大理同隸蒙氏細奴邏居之號蒙舍詔後改為陽瓜州段氏改開南縣元為蒙化府又降為州國初因之屬大理正統間復改為府

鶴慶軍民府漢隸益州又分隸永昌郡唐初越析詔地名曰鶴川又曰漾工蒙氏置謀統郡段氏改府元置鶴州後改為鶴慶府又為路國初改路為府尋改為

軍民府領州二劍川州

古名也浪字詔與南詔戰敗保此稱劍浪蒙氏併之置劍

川節度後臣吐蕃為吐蕃暎段氏改義舒暎羅順州  
魯城羅魯華言海也元改劍川縣國朝陞為州

唐名牛暎羅落蠻  
居之元改為順州

姚安軍民府本滇地漢置弄棟青蛉二縣唐置姚州以

其地多姚姓也蒙化改弄棟府段氏為統矢邏又改

姚府元改姚州尋陞姚安路國朝改為府後改為軍

民府領州一縣一姚州

附郭漢弄棟  
沿革與府同

大姚縣

漢青蛉  
唐西濮

州改擊州段氏為  
大姚堡元改為縣

廣西府古滇國東南境漢牂牁郡地後為東爨烏爨彌

鹿等所居唐為羈縻州後師宗彌勒二部寢強蒙氏

段氏不能制元時內附置廣西路國朝改為府領州

三師宗州

蠻部據名匿弄甸元以本部領阿寧豆勿阿盧豆英四所後改為州

彌勒州

蠻部據名郭甸巴甸部籠元以本部領吉輸哀惡部籠阿欲四所後改為州

維摩州

元置領維

摩屈中二所後改為州

尋甸府古滇地棘刺蠻居之其部曰仲劄溢源後為烏

蠻新丁所奪號新丁部訛為仁地蒙氏為尋甸段氏

曰仁德元置仁德府國初改為尋甸軍民府土官領

之成化間以土酋相殺始設流官改尋甸府

武定軍民府漢益州地也唐隸姚州獠鹿諸蠻居之段氏為羅發部元改武定路國初改軍民府土官鳳氏領之隆慶間以叛誅始設流馬領州二縣一和曲州

附郭即羅發地有甸曰  
叵蓮元改和曲陞為州

元謀縣

舊曰環川  
元置今縣

祿勸州

舊為

洪農祿勸甸  
元改今州

景東府古曰柘南昔撲和泥二蠻居之名猛谷又曰景董唐以前不通中國蒙氏立銀生府後移於威楚其



地復為蠻有元討平之置開南州國初改為景東府  
元江軍民府古西南極邊地曰惠龍甸又名因遠部蒙  
氏置威遠瞭後和泥蠻據之曰羅槃甸宋儂智高之  
黨竄此元時內附置元江路領羅槃馬籠等十二部  
國初政府永樂間改軍民府領因遠羅必甸長官司  
麗江軍民府古荒服地漢唐皆隸越雋蒙氏置麗水節  
度後為蠻酋蒙醋醋所據元討平之置麗江路國初  
政府後改軍民府土官木氏世居之領州四通安州

附郭漢定峯縣唐

寶山州

漢邦龍縣境元置寶山縣尋陞為州

蘭州

漢博

南縣唐羅眉州段氏

置瀾滄郡元改今州

巨津州漢羅發九畎諸蠻所居元置今州

舊有

縣曰臨西正統間仍屬本府

廣西府叢山深林古無郡邑宋儂智高裔居焉曰特磨

道元立廣南路國初改府仍以儂氏官之領州一富

州

元置

順寧府古百濮地也後訛濮為蒲地曰慶甸蒲人世據之自古不通中國元時內附置順寧府并寶通州慶

旬縣國朝因之而省州縣入府後隸以雲州

蠻名猛祐熒夷

所居元時內附屬麓川路國初置大候長官司尋改為州土官奉氏領之萬厯間土酋叛討平之改今名

隸順

寧府

永寧府古名樓頭睽又名荅藍一名茶藍地接吐蕃蠻

泥月烏者居之後屬南詔元呼必賚駐師日月和即

此尋內附置永寧州國初因之永樂初陞為府土司

阿氏官之領革甸刺次和香羅瓦魯之四長官司

鎮沅府在西南極邊地昔撲和泥二蠻居之唐屬蒙氏

又為金齒獋夷所奪元初內附立威遠州及案板寨  
國初改鎮沅州永樂間陞為府領祿谷寨長官司

北勝州漢以前屬白國時鐵橋西北施蠻據之蒙氏闢  
其地為北方睽徙諸蠻以居號劒羌又曰成偈睽又  
改善巨郡段氏為成紀鎮元置施州後改北勝府國  
初仍為州初屬鶴慶及瀾滄衛正統間改隸布政司  
葭葉州唐名羅共睽元置今州屬北勝府國初屬鶴慶  
後改隸瀾滄衛

新化州舊為馬龍他郎二甸阿𤇗諸蠻世據之元時內  
附屬之元江路國初改馬龍他郎甸長官司弘治間  
改今州隸布政司

全省封疆東界廣西南界交趾西界𤇗夷北界四川東  
北五百里至貴州普安衛東七百五十里至廣西泗  
城州東南六百三十里至貴州烏撒可渡南四百六  
十里至廣西上林州西南三千五百里至南海西六  
千里至西洋海西北二千里至吐蕃北四百里至四

川會川衛自司至應天府七千二百里至順天府一萬六百四十五里嶺南郭棐曰按周武王孟津之會及于濮人則其入中國自周始矣漢武開邊選守令治其地考之當時置益州郡領縣二十有四曰滇池雙栢同勞銅瀨連然俞元收靡穀昌秦臧邪龍味昆澤葉榆律高不韋雲南僑唐弄棟比蘇賁古毋掇勝休建伶來唯其屬越雋郡縣有二遂久青蛉屬牂牁郡縣三平夷漏卧句町其在今日幅員視漢更廣大

矣傳沐諸將軍開拓之功仰贊我高皇帝廓清之治  
豈不宏遠哉

滇畧卷一



欽定四庫全書

滇畧卷二

明 謝肇淛 撰

勝畧

大塊靈淑之氣不洩為人文則結為山川南天荒徼  
顓蒙未開故其勃鬱磅礴山斧削而水電飛至於詎  
怪鬼裔之奇不可名狀惜其自古以來職方不隸杖  
履罕經流賞題詠若斯而止今所存者亦千百中之

什一耳昔尼父居夷伯陽入胡豈故逃之六合之外  
或有取爾也矧被聖化日月悉主悉臣者哉故擇其  
較著以俟觀風者採焉

金馬碧鷄二山在滇省城外西為碧鷄東為金馬相距  
五十里許中隔滇池漢宣帝時方士言其有神可祠  
而致遣諫大夫王褒求之顏師古曰碧形如鷄金形  
如馬故名一云以有鳳凰及龍馬隱見於上名之顏  
說非也元張雄飛詩北闕辭丹鳳南雲看碧鷄紫苔

移玉座瑤草濕金泥雨霽龍歸洞風生虎渡溪尋梅  
穿竹徑採藥躡松梯白日依山盡青天入海低寄書  
無鴈過擇木有猿啼花映高低樹園分遠近畦飛星  
馳寶馬沈水吐銀猊魚戲蓮房北鷗眠荻渚西長歌  
漢頌罷刻石紀新題

五華山在省城中雄瞰千雉四望無際其上有寺樓閣  
宏麗為滇諸刹之最都御史錢塘鄭顥詩上人棲迹  
雲霞中樓居背倚青芙蓉映簾花木四攢遠深幽雅

稱金仙宮古聞滇陽稱佳麗五華特秀西南叢滄波  
遠引勢吞吐城闌俯瞰煙溟濛樓臺萬井互參列浮  
圖百尺高凌空面前岡巒總奔附嵯峨宛若君山峰  
太華山在碧鷄西北俯瞰滇池迥出遠近諸峰之上絕  
頂有寺元僧玄鑑建永昌張含詩滇國地形惟此最  
青霄樓閣迴招提山圍雉堞籠金馬海撼龍宮浴碧  
鷄雲裏鶴巢松樹遍風前仙梵雨花迷諸天不在藤  
蘿外中夜起看星宿低銅梁張佳胤詩石牀橫架萬

峰西海上雙明入戶低自是山中無玉漏朝來還有  
碧鷄啼又焚香高卧大華烟鶴唳松濤夜不眠欲向此  
中尋住著海心月在白雲天

螺山在省城之北山無草木石皆青色盤旋若螺髻焉  
其下有潮音洞深黑莫測有人燃炬行兩日阻水而  
還前為圓通寺依巖谷為之窮極幽險都御史吳興  
顧應祥詩有雲擁數峰環寺立煙開一徑傍城灣之  
句

滇池即昆明池也在省城西南周廣五百餘里合盤龍  
江黃龍溪諸水為南中巨浸其水源廣而未狹有似  
倒流故曰滇漢武帝欲伐西南夷於長安穿昆明池  
象之以習水戰其上為太華金碧諸山其外有金稜  
銀稜澄清諸河菡萏蒲荇魚羸菱芡之產不可殫窮  
元李京詩嫩寒初褪雨初晴人逐東風去權輕天際  
孤城烟外暗雲間雙塔日邊明未諳習俗人爭笑乍  
聽侏僂我亦驚珍重碧鷄山上月相隨萬里更多情

明顧應祥昆明池歌昆明池延袤數百里千山萬山  
直自崑崙來諸山之水匯於此相傳其水顛倒流滇  
池之名由此始左有金馬山右有碧鷄峰瀰漫浩瀚  
渺無際但見洪濤巨浪日夕排蒼空青天忽驚白日  
起霹靂震撼蛟龍宮天吳水怪九首八足不可以名  
狀時復出沒于其中有時風恬波浪息一碧萬頃開  
青銅其廣也如此胡為乎不在九域之內不得與五  
湖七澤相爭雄神禹治水跡不到穆王八駿難為窮

漢武鑿池徒彷彿王褒將命何匆匆唐宋以來各僭  
據聲教不與中國通天開景運聖人出一掃海內羣  
邪空五服之外更五服俯首受命歸提封侏儻椎結  
之類吾不知其幾千萬種禮樂不異車書同眇余生  
當全盛日觀風兩度乘青驄古來多少豪傑士局于  
偏安之世不得一洗塊磊胸百年過眼一彈指得此  
勝覽真竒逢振衣獨立太華頂狂歌目斷孤飛鴻  
滇池西二十里有海源洞中可容數百人四壁削立石



乳倒垂凝成幻象千狀萬態不可數計其下有龍湫  
流水清淺四時不竭雨旱禱之輒應

玉案山在滇池北十餘里一名列和蒙山秀麗多泉石  
山北有三泉如盆池上有玉案遠近佛刹攢列其最  
勝者為筇竹寺花木幽翳靜室清絕遊俗罕至寺僧  
皆修頭陀行守戒苦節其得道者終身未嘗下山山  
椒有碁局相傳有仙人奕于此唐道南和尚詩松鳴  
天籟玉珊珊萬象常應護此山一局仙碁蒼石爛數

聲長嘯白雲間乾坤不蔽西南境金碧當分左右班

萬古難磨真蹟在峰頭鸞鶴幾時還

南詔通記  
作牟浚詩

高峽關在昆明縣東雲津橋之北舊有城嘉靖初成都  
楊慎謫戍永昌來往滇池相其地卜築焉樂其勝概  
為作十二景詩後竟卒于此今其莊亦荒廢張佳胤  
高峽弔楊太史詩君自投荒日飄零瘴海間風雲辭  
玉署歲月老紅顏著述愁中盡詩篇病後刪大名留  
死諫前席阻生還石表何因折泉臺不可攀知無封

禪草誰問碧鷄闕  
僮僕將孤櫬  
文章遍百蠻  
空餘載酒處  
寂寞鎖青山

軟霧山在嵩明州東四十里  
世傳蒙世隆征烏蒙得四女  
歸至此山  
四女遙望故鄉  
俯仰嘆息  
忽山顛霧結  
三峰巒謂三為軟霧  
為霧其山崑崙獨峻  
登眺則雲南悉在目中  
又名峻蔥山

滇溫泉最多而安寧州之碧玉泉為冠  
在城北十里許  
四山壁立中為石凹  
飛泉注焉  
清可鑒髮香可淪茗

有坐石正方碧色如玉故名楊慎亟稱之謂海內第一湯其上為曹溪寺倚山飛閣登之可望百里諸山有海眼泉一日三潮隨涌隨涸相傳僧戒照卓錫之所楊慎詩點岫靈砂址華清譽石湯佳名雖許並仙液詎堪方大井元通脈曹溪且讓香流溫涵水碧氣鬱謝硫黃清暑南薰際回暄北陸傍體應偕鷺潔心不假犀涼春醞熏蘭茝雲腴泛茗槍弄珠餘浣女鱸玉贖漁郎瑤草蟠千歲瓊芝綴九房溫泉真此地難

老更何鄉

點蒼山一名靈鷲山在大理龍首龍尾兩關之間繇亘百餘里若屏風然有十九峰環列內向峰各一澗懸瀑而下散入市廛村墅東注于洱河陰崖積雪經夏不消故亦名雪山山腰時有白雲橫亘如帶蒙氏封為中嶽漢書曰邪龍雲南注山似扶風太乙之狀上有馮河周迴萬步五月積雪皓然即此山也山中梵宇叢林絡繹相望相傳為阿育王封國三千蘭若茲

得其半今所存什一耳馮河在玉局峰之下巖壁聳  
削潭水清澈每有墜葉鳥輒銜去志云觀音大士放  
黑龍於此也其北麓產文石黑白分明如畫可為屏  
障元高昌雅詩水繞青山山繞城由來人傑地應靈  
水光萬頃開天鏡山色四時環翠屏康里子山詩有  
客新從鶴拓來自言曾上五華臺蒼顏暑雪當窻見  
玉脚晴雲對檻開桂樹小山招隱士桃花流水屬仙  
才王孫芳草年年綠為問西遊幾日迴

點蒼山有二龍潭南潭黑龍居之北潭黃龍居之黃龍  
善而黑龍惡二龍相與鬪黑龍敗眇其一目潛於潭  
底人近之輒雷電暴作或云此即大士所放之龍也  
俗名其水為高河每歲五月溪上不時有雨而田野  
烈日皦然割麥插秧兩不相妨相傳觀音大士授記  
而然

蒼山三陽峰葭原之上有風洞風從地孔中出雖五六  
月吹人肌骨寒顛即壯夫不能久立也臨安納樓長

官司東二十里亦有風洞四時不絕滇之多風其以此耶鶴慶亦有之

鷄足山一名九曲在大理東北一百里峰巒攢簇如蓮花盤曲九折一頂三趾若雞足然故名上有石門七十二峰林樾雄深梯磴險絕世傳佛大弟子迦葉守佛衣以待彌勒之所後涅槃於此至秋夜不時放光一山盡明有白石菴河子孔洗心橋迦葉殿羅漢壁袈裟石獅孫梯大悲閣虎跳澗拜佛臺曹溪水大小



龍潭華首門迦葉洞絕頂四望萬山皆伏唯點蒼西  
峙與之頡頏近侍御史南海潘公濬建觀風臺其上  
尤稱壯觀前後遠近蘭若七十有二窮極幽勝西域  
天竺諸僧歲時雲集香燈梵唄百里相望殆非人境  
閩鄧原岳詩葉榆水從山脚流點蒼鷄足俱神丘東  
西對峙爭奇絕翩翩靈蹟垂千秋我聞鷄足之山元  
淨土迦葉授衣即其處禪宗正印信難求釋氏遺踪  
或可觀相傳八月佛放光輪囷五色還非常琳宮紺

宇不知數浮圖寶刹凌蒼蒼我來登覽多所歷煙霧  
冥冥恍相失披逕先尋兜率菴捫蘿再扣袈裟石江  
風吹雲雨如注猢猻孫梯滑不可度大悲閣在山之巔  
下視羣峰互吞吐須臾雨散雲亦開指點遙山青翠  
來麗江雪嶺白照眼茫茫海水浮銀杯捨身崖前多  
虎跡仙碁石上草花碧拜佛崖懸千仞岡曹溪泉冷  
成丹液華首門扃亦已久昔時衣鉢今何有洞天寂  
寂雲四封層巒半壁苔衣厚俯瞰下方亦可憐幻成

百里兜羅綿我生一作空明想便如鉢裏開青蓮聞  
見如來非色相眼底何須說真妄佛地機關只自知  
靈山面目聊堪狀信宿山中俗慮清欲從此地學無  
生不然解帶還山去身騎赤龍朝玉京

西洱河在大理城東即葉榆水也一曰洱海禹貢道黑  
水至于三危入于海注云西洱海與葉榆澤相貫又  
水經注云葉榆水道交趾麋泠縣東逕浪泊其水黑  
似榆葉漬之而名按司馬相如文畧斯榆注斯音曳

又史記漢書皆作櫟榆未可以臆解也水經曰罷谷之山洱水出焉山在浪穹縣北泉湧起如珠樹經玉案山前繞郡而南西出天橋點蒼山後是為潯水與漾水合又西入于蘭滄江又南入于海其水有三島四洲九曲彎環如新月島形如案故名玉案石上有朱文若古篆不可辨世傳是大士與羅刹買地券也石壁上刻云此水可當兵十萬昔人空有客三千蜀都賦云諸葛亮之平南中也戰於是水之南其後唐

開元中李泌王天運等伐南詔前後覆軍二十萬皆  
沒于此水濱有神祠其狀牛首人身或虎頭雞喙皆  
大石自地湧出非人工也雨旱禱之輒應冬月海風  
水面常有陰火高數丈起海賦曰陰火潛然是已東  
岸有分水崖儼若斧剗南為河北為海所產魚不相  
入八月望夜時有珊瑚出水面志云即恒河也元舒  
魯杰詩洱水何雄壯源流自鄧川兩闕龍首尾九曲  
勢蜿蜒大理城池固金湯鐵石堅四洲從古號三島

至今傳羅閣憑巖嶮蒙人恃極邊要當兵十萬不數  
客三千世祖親征日初還一統天雨師清瘴癘風伯  
掃氛煙民物因蕃富封疆近百年點蒼山色好銘刻  
尚依然

漾水一名神莊江源出劔川經趙睽過打牛坪遶點蒼  
之背與潯水合淼漫無際俗謂之漾備江謠云過了  
漾備渡閭王請上簿到得龍尾關纔是到人間言其  
瘴毒甚也

蘭滄江一名鹿滄其源出吐蕃嵯和哥甸一云出莎川石下其石似鹿故名自麗江度雲龍州至于永昌廣僅三十餘丈其深莫測其流如奔東流經順寧達于車里入于南海即漢書所云搏南蘭津也今日瀾滄俗謂之浪滄蒙氏封為四瀆之一其江中有物黑如霧光如火聲如折木破石觸之則死或云瘴母也文選謂之鬼彈內典謂之禁水惟此江有之他所絕無李元陽曰此即禹貢黑水至于三危入于南海者也

潞江在永昌南百餘里一曰怒江源出雍望奔流而下其深莫測兩岸陡絕入夏則多瘴毒不可渡蒙氏封為四瀆之一

趙州南六十里為白崖古廟中有鐵柱諸葛武侯定南中歸以紀功也至唐咸通間蒙酋世隆復重鑄之故郭松年大理行記以為非武侯所立不知張樂進求時已有鐵柱矣崖半有畢鉢羅窟巖壁聳拔千丈餘其下林麓翳翳無路可由南詔時有杜老蠻者即崖



而寺之捫壁而上有獨木橋十餘所長三尺或五六尺巖嶮不敢著足樵子僂疾者履之而過亦不損折其木非常見之材每月十五夜換橋一次不知其因十六日但見橋製更新無復舊木矣世傳神仙所為因謂之仙橋昔寺僧畜犬仙橋遂斷後屏犬橋復完成化間壁上見詩云懸崖萬仞沒躋攀樓觀參差杳靄間一派水流蒼石隙數聲猿嘯白雲間堪嗟蕭史乘鸞去定是王喬駕鶴還唯有靈橋高絕處幽禽惆

悵對空山不註姓氏然其地士人所不能到竟不知誰為也

青華山在雲南縣南八里其下有洞山僅培塿而洞深邃不可窮懸崖滴乳愈深愈竒上有石竅漏光若天憲然歧逕支分人入必糜糠以志其返每歲季夏二十四日土人士女還至以炬火焚之云不爾必有蜘蛛之齧或云此即唐三藏取經遇蜘蛛怪處也御史李元詩青華洞深且密神工融鬼斧劈茫茫天壤間

此理不可詰無乃渾沌初闢時浩氣噓泡成幻質沿  
苔捫石豈容已宛若風雨投暗室虛幽極處明自生  
時復有竅見天日祛昏破晦露真機萬態千形難盡  
述行行洞口更升巔笑看扶桑紅日出

九鼎山在雲南縣西北二十里一曰寶泉九峰相並望  
之簇如青蓮石穴空洞盤折而升其上有九鼎寺毘  
盧閣古佛洞華嚴洞玉峰塔諸勝倚巖結構飛梯令  
人登之有挾風生羽之想吳郡馮時可詩九鼎巔屹

望裏新長松落落逼蒼旻蜂房燕壘虛無地薤簾藜  
牀遠絕塵雲宿下方流玉葉月生半壁吐金輪最憐  
政暇能兼隱倚石看山更幾巡

水目山在雲南縣之南二十餘里山巔有泉深不可測  
南詔段氏於此建水目寺相傳初建時有僧阿漂為  
工匠都養炊爨汲水以供衆僧未嘗違失日則奔走  
勞苦夜則懸首廟梁三十餘年其懸髮金鈎至今猶  
存嘗挈筐入市貨乳酪蔬菌之屬雖二百里外產者一

日致之人因其出窺其室中見漂閑戶默坐置筐坐  
前有頃筐中諸物自盈見者喧於衆漂遂立化寺有  
白虎窩黃龍木夫之異有貴客至木夫自吠今遺址  
猶存

金沙江一曰若水源出旄牛徼外

在麗江西北

東南至于麗

江鶴慶北勝姚安諸界水濱產沙金故名山海經曰  
黑水之間有木名曰若木若水出焉水經注曰若水  
南經雲南之遂久縣今金沙江巡檢司是也又東流

合繩水孫水淹水瀘水注于馬湖諸葛亮南征渡瀘  
即此昔黃帝長子昌意德劣不足紹承大位降居斯  
水為諸侯娶蜀山氏女生顓頊於若水之野是其地  
已楊慎宿金沙江詩往年曾向嘉陵宿驛樓東畔欄  
杆曲江聲徹夜攪離愁月色中天照幽獨豈意漂零  
瘴海頭嘉陵回首轉悠悠江聲月色那堪說腸斷金  
沙萬里樓

水經曰葉榆水西北有鳥弔山世傳鳳凰死於此每歲

秋冬百鳥羣聚鳴呼啁哳土人夜然火張羅待之鳥投  
火罹羅多有異羽匪直滇產也內無噤者以為特哀  
不食稱為義鳥放之今鄧川浪穹之間有鳳羽鄉山  
曰鳥弔每九月至十一月夜中萬鳥羣聚居民燭而  
羅之所獲萬計與水經所載無異楊慎詩鳥弔山頭  
百鳥傷刺桐茅竹隱斜陽九苞文采不復見千古令  
人空斷腸按蒙化亦有鳳凰山其說與此同

按鳥以  
赴義至

而小民無知網而取之不仁甚矣  
萬厯己未余至始行邑禁絕之

天橋在大理西南三十里洱水下趨處也相傳蒼洱之間其初皆為水國觀音大士鑿石為橋洩水民始得平土而居其石下斷上連絕壑深塹若梁跨之憑虛凌空可度一人故名天橋橋邊激水濺珠宛如梅樹人呼曰不謝梅亦奇觀也橋之北有沓嶂又名一線天水故道也石林古色可吹洞簫莆田方沆詩蒼嶺青未了寒煙野戍平危梁通地脈削壁類天成霜色孤鴻暝濤聲萬馬行昔年曾割據形勝控榆城閩陳



巖之詩似入天台路橫梁跨壑懸川應疑禹鑿石豈  
仗秦鞭歸鶴來何處長虹卧不還支機隨意取不必  
待張騫

點蒼山龍泉峰下有諸葛武侯畫卦臺云世傳武侯南  
征屯兵於此披草萊中得石刻伏羲像因作八卦臺  
祀之土人以為祭天又名曰祭天臺其龍關以西謂  
之天威逕蓋取孟獲公天威也南人不復反之語唐  
高駢詩豺狼坑盡却朝天戰馬休嘶瘴嶺煙歸路嶮

巖今坦蕩一條千里直如弦萬里驅兵過海門此生  
今日報君恩回期只待風煙淨不遣征衣有淚痕

大理之南有蕩山寺一名感通漢摩騰竺法蘭由西天  
竺入中國時建也唐南詔重新之其地山巒迴合林  
樾蔥蒨佛堂之外僧院三十有六四壁繪人天諸相  
皆極工麗中堂石上有僧趺跡云洪武十六年寺僧  
無極率其徒入覲獻白駒一山茶一上臨軒受之山  
茶忽發一花上異之賜御製詩一十八章叙其水陸

往返之勞併序刻於石其東麓曰獅山環山而河幽  
靜可賞

弘聖寺一名一塔寺在大理城西其北有崇聖寺亦曰  
三塔寺皆勝地也弘聖有塔高二十餘丈十有六級  
相傳周時阿育王所造塔也其上有閣宸蒼山面洱  
河原野雉堞皆在指顧之中左有諸葛武侯祠及楊  
慎所摹禹碑崇聖三塔中者高三百丈外方而內空  
其二差小各錯金為金翅鳥立其上以厭龍也不知

何始塔頂有鐵鑄款識云貞觀六年尉遲敬德監造  
開元初南詔修之請唐匠恭韜徽義重造中觀音像  
高二丈許蒙氏董善明者籲天願鑄是夕天雨銅取  
以鑄像僅足而止像成之日瑞光五色樓有鴻鐘聲  
聞百里其外萬松離立蒼翠際天僧房花木幽翳臺  
閣孤蔓至者徘徊不能去程本立詩眼中城郭與山  
川坐我江南罨畫船雲氣半空飛白雪水光一鏡落  
青天野牆樓樹人家住官路梅花驛使傳最是僧房

聽梵唄此心能洗百憂煎

判文山在臨安府城南二十里高千餘仞中有三峰削  
出如筆架昔大理段思平外舅爨判居其上因名有  
祠焉學士王景常判山翫月歌判山山上秋月明判  
山山下秋水清道人持盃待明月氣壓泰華吞滄溟  
姮娥靚粧倚碧井照見琉璃幾千頃興來吸盡金巨  
羅舞袖徘徊弄清影嘉靖中學使趙維垣易名煥文  
巖洞在臨安東二十里一名雲津洞山形綿亘林徑縈

紆衆水歸宿伏流會盤江達于南海洞口空濶可容  
數百人前阻深潭無徑可通遊者循山背行達中洞  
結橋而度列炬而入石髓凝結倒垂千態萬狀益西  
南第一洞天也其後有小洞二曰南明曰萬象南明  
黝黑中忽有天窓豁然明朗萬象峻濶嵐靄層結如  
雲霞飛布其上尤為奇絕云學憲秀水吳鵬詩雅志  
在山水臨眺興無倦矜望城東郊幽巖表南甸使君  
復愛客撫景開芳宴解帶遡南風手掬冰花片披榛

得微路延瞰中巖徧結橋度雲溪列炬散晴電怪石  
蚪龍翔層臺玉芝炫旋轉尋丈間幻化千萬變勢凌  
天姥竒名並桃源擅自非神明護乾坤豈終見日來  
苦塵縛勝引資游衍薄暮下山椒心賞徒留戀安得  
長公術移此中州奠依棲鍊五藥辟穀謝朝彥  
阿迷州北三十里有火井其水溢出流入于田井中常  
有煙氣投以竹木即燃夜則有光四傍石亦皆熱出  
煤可以代薪

異龍湖在石屏州之東有九曲週百五十餘里中為三島小島名孟繼龍有蛇蟲不可居昔蠻酋以有罪者流於此中島名小末東大島名和龍湖蠻立城於上漢名水城四面皆巨浸東流入于瀘江

太保山在永昌府西其名不知所始差我東向高千餘尺橫岡數里山巔平行可習騎射嘗有掘地者於土中得巨磚甚多皆有平好二字周遭林木蒼翠煙雲變幻稱奇觀云



哀牢山在永昌東二十里孤峰秀聳如拱如坐高三百丈餘雄視西陲延袤三十里許頂石巉巖如鱗有二穴名天井水出其中土人於春首視水之盈涸卜歲之豐稔穴下相通取左穴水則右穴涸取右穴亦然山下有石如鼻二孔出泉南溫北冷分流數十步復合為一號玉泉故又名玉泉山

博南山在永平縣西南四十里一名金浪山其巔又名丁當路極險隘乃蒲蠻出沒之所昔南詔遣將軍征

緬回師多齋金寶經此山遇盜將軍死之後立祠于  
此北麓有泉流為花橋河方沆詩萬里哀牢地雙旌  
度博南林開山列障天遠樹如簪嵐氣征衣重霜華  
旅鬢含蘭津看漸近訪古一停驂

羅岷山在永昌東北百里蘭滄江西岍也高千丈袤四  
十餘里相傳蒙詔時僧羅岷者自天竺來此嘗作戲  
舞山石亦隨而舞後沒土人祠之巖下時墜飛石過  
者驚趨謂之催行石相傳上有野獸拋踏而下後有

人將曉時見石自江中飛上霧中甚多不由獸也有  
橋于兩岸曰霽虹纜鐵梯木懸跨千尺郡人張含詩  
蘭津之南何崔嵬水寨仄路盤空迴江氛嶺稜日月  
翳山狂谷很猿猱哀天風高屢見電嚴冬地迴常  
聞雷鉤藤毒葛四時茂鸚哥杜鵑千樹開

卧獅山在永昌南十五里以形名高百丈餘袤二里許  
其上有洞曰芭蕉廣二尋高稱之入深百五十步其  
中石乳燦爛有如蓮如鐘如傘之異故又名石花山

雲巖山在永昌城北二十五里高二百丈餘盤迴三里許雜木陰森巖石深百步中有石橫卧于下長丈餘好事者鑿而為佛建寺以覆之扁曰雲巖卧佛其左有洞洞門高三尺深十餘丈寺外築臺建門臺下有池

高黎共山在騰越東北百餘里古名崑崙岡夷語訛為高良公云界龍潞二江之間潞江冬月無霜而此山巔霜雪嚴沍蒙氏封為西嶽山上下東西各四十里

登之可望吐蕃之雪山山頂有泉東入永昌西入騰  
越故又名分水嶺侯璉詩高黎共山花正紅千岫萬  
岫煙雲中險道客蹇鎖青黛絕巖突兀摩穹窿鶯聲  
鶯聲滿丹嶠遠色近色皆蒼松記取此景付彤管豪  
吟野眺生春風其左右有平川名彎甸炎熱瘴癘商  
賈謠曰冬時欲歸來高黎共上雪夏秋欲歸來無奈  
彎甸熱春時欲歸來囊中資糧絕

永昌龍泉門外有九隆山相傳哀牢夷九龍兄弟世居

此山之下諸葛亮南征時鑿斷山脈以洩王氣今遺址猶存其麓有泉自地湧出凡九竇郡人斲石為池承之其下匯為大池可三十畝名曰九龍池夏月荷花盛開中有畫船可以游汎武陵江盈科謂滇人不知舟獨昆明池與此耳張佳胤詩陂塘晴射海霞紅樓榭清陰落鏡中古木浮槎天上過平橋流水席間通歌聲漸起千峰月寒氣非關九夏風環視盡搖河漢影對君疑坐斗牛宮

烏蒙山在祿勸州東北三百里一名絳雲露山北臨金沙江山有十二峰聳秀為一州諸山之冠八九月間常有雪故又名雪山其頂有烏龍泉下流為烏龍河蒙氏封為東嶽

蒙樂山在景東府北九十里一名無量山高不可躋連亘三百餘里中有石洞深不可測一峰特出狀若崆峒蒙氏封為南嶽其南有泉為通華河其北有泉為清水河俱東入于大河

永平縣有打牛坪相傳諸葛武侯南征至此值春日鞭牛教民耕稼後人因以名之

廣通縣翠屏山中有湯團箐云武侯擒孟獲駐師於此時臘月二十四日也軍士追思荆楚以湯團祀竈乃炊而食之未盡者棄之而去至今箐中小石形類湯團然

楚雄城北有坡曰青峰坡其上一石高八尺廣半之名曰峨碌石一人撼之則動聚衆挽之巖然不搖



潑江城南十里有湖曰撫仙周三百餘里北納諸溪南  
受星雲湖泓涵清澈一碧萬頃玉筍山撫其上宛若  
仙人憑鏡而立故名也山舊名湧拔屹立水際高峰  
刺天不與羣峰接狀如玉筍然其北有羅藏山羅藏  
夷言虎柵也昔有虎自碧雞渡滇池至此土人造柵  
以取之山高可五千尺其上寬平有龍湫時興雲霧  
元梁王立寨其上故又名梁王山飛泉自峰頂落流  
入四遠

竹掃寺在蒙化南百里許無院無僧止有石佛旱則蒙  
人舁之城隅禱應即還山所居左右產竹甚茂竹稍  
下垂拂石其潔如掃亦一奇蹟也

石寶山在劍川西南二十里上有靈泉狀如仰白纔容  
斗水百人挹之不竭不挹亦不盈也洞中有石佛石  
棧石井石人以至獅象鐘鼓蛙蛇之屬遍于陵谷皆  
石也大理李元陽記謂緣崖諸石像如大士羅漢者  
甚多皆若雕鏤然及省其手足指爪剝折之處又皆

空洞如人骨然乃知其為天成也楊慎詩初地追清  
賞名山愜素聞峰巒合元氣樓殿截霞氛灌木長藤  
繞幽篁細路分剛風凝石髓香梵滿崖薰泉溜瓊瑱  
響天吳紫蘚文興因靈運發人是謫仙羣泰客迷青  
靄湯休和碧雲便應開淨社甘露洗塵紛

方丈山在鶴慶府城南一百里巍然峻拔山半有洞中  
有池深不可測水滴巖下如方響音昔蒙氏羅閣鳳  
琢觀音像於壁故又名觀音山南詔名山凡十七此

其一也

鶴慶東南七十里山名大成坡頂有泉圓徑尺許深如  
之終歲不溢盛夏不涸相傳南詔蒙氏過此三軍無  
水渴甚遂拔劍挿地泉隨湧出至今行人資焉謂之  
一碗水

師宗州東有山曰馬者籠高峻雄峙勢莫與京其西二  
十里地名阿定鄉有小山高可五丈盤根數百尺弘  
治十年一夕忽移于此山之傍上有三大樹隨山而

徙根枝如故土人但聞風雷聲旦起視舊處已為平地矣

阿廬山在廣西府西延亘四十餘里南接彌勒北跨師宗舊有阿廬部居之故名山麓有洞深黝不可窮中有雕欄寶塔鐘鼓卧牀佛龕之異

尋甸北五里有龍泉洞水湧出灌地數萬畝洞中深邃蝙蝠甚衆遊者明炬輒為所滅洞中有一雀俗呼為龍雀如遇木葉墜水輒為銜出郡中亢旱祈禱輒應

獅山在武定城西五里許峰截如削壁立千仞其巔平  
敞里許有泉噴出潞為小池池旁羅漢松一株大數  
十圍霜柯鐵幹世所罕見巖半有菴曰龍隱中祠建  
文皇帝云帝自靖難師入自髡以出栖此山者四十  
餘年始自白歸大內今其像禪衣錫杖淒然老衲狀  
也

雪山在麗江西北二十餘里一名玉龍山條岡百里巖  
嶺千峰上插雲霄下臨麗水山巔積雪盛夏不消巖

泉瀑布百道飛流蒙氏封為北嶽元李京詩麗江雪  
山天下絕積玉堆瓊幾千疊足盤厚地背摩天衡華  
真成兩丘垤平生愛作子長遊覽勝探奇不少休安  
得乘風凌絕頂倒騎箕尾看神州

瓊英洞在順寧西南西粵山之麓其山層峰疊壑石壁  
橫峭洞口豁然如城闕狀可十丈許嵌空奇崛其上  
有青蓮華蓋朵朵下垂洞中石鐘鼓磬擊之琳瑯  
成韻深邃莫窮幽致萬狀盡西南之奇觀也董難

詩有云茲山奇絕不可紀嶙峋嵌空難與比晦明幻  
化神物潛章亥艱難不到此山鬼啾啾木客號古藤  
絙索垂猿猱山禽百韻隔雲木落日熊羆呼其曹路  
斷弔橋懸怪石宛若晴虹高萬尺懸幢度索越他山  
颼颼天風吹羽翮煙霞不隔水源深仙境微茫何處  
尋人似避秦雞犬近松根履足蹙然音洞門深鎖桃  
千樹山靈謝指桃源路翠觀岑青紫府圖鬼工斲處  
心驚怖石鐘纍纍石乳香龍飛鳳翥石筍長石鐘石



鼓還石磬鈞天樂派音鏗鏘仙人酤我長春醕一飲  
驪襟無處所仙詞瀏亮滌塵煩自信仙緣吾與汝

北勝州南有九龍山高萬丈餘磅礴百里山有九峰於  
麓仰視則九山皆齊登其中峰之巔則衆峰才及其  
半四顧無際可千里餘

赤石崖在北勝州西北三里許相傳禹乘赤龍治水至此  
以斧劈之故山石皆殷赤色崖半有泉其味如醴仲  
春居民郊遊爭掬飲之布穀一鳴其味即變

滇畧卷二

欽定四庫全書

史部

滇畧卷三

詳校官編修<sub>臣</sub>曹振鏞

檢討<sub>臣</sub>德生覆勘

總校官庶吉士<sub>臣</sub>倉聖脉

校對官主簿<sub>臣</sub>汪日贊

謄錄監生<sub>臣</sub>王寶唐

欽定四庫全書

漁畧卷三

明 謝肇淛 撰

產畧

語曰十步之內必有豐草禹貢黑水梁州土青黎而  
賦下中三錯聖人羈縻荒服固不竭澤而漁之也商  
周西南之獻及於象齒矩狗已非却焚之懿軌矣至  
漢書始言滇上平敞有鹽池田漁之饒金銀畜產之

富人俗豪怙居官者皆富及累世夫官之富民之瘠也至於今而惟正之徵發歲增筐篚之羔鴈日廣市儉箕斂以鴟張貪估壟斷而罔利刮金佛面削鐵針頭鮒已涸而決無時馬方逸而求未已滇自此困矣故上有閉關焚裘之令而後源可清下有馬羊金粟之長而後流不竭其以為陸海而捆載之非余所敢知也

湯四方獻令曰西南產里

即今車里

百濮以象齒矩狗為獻

孔氏曰矩狗狗之善者也今志作短狗誤

周王會白民

即滇白人

貢乘黃

似麒麟有角

卜人

即濮人

貢砂

丹砂也

黑

齒

即永昌夷

貢白鹿

漢元狩間張騫使大夏見邛竹杖問所從來曰邛西二

千里身毒國所產遂遣使至滇指求身毒身毒今天

竺也距麗江可二千里又廣志云永昌有濮竹園三

尺餘大者一節受一斛可為船小者數升可為楫槥

杜詩籠竹和煙滴露稍籠吐蕃地名也舊唐書吐蕃傳

有籠官大籠官又韋臯傳擒籠官四十五人擒主籠官節度則其地產竹因以名之耳張志淳南園漫錄載之

唐蒙使南越食蒟醬問所從來曰道西北牂牁今臨安大理俱有之即葷菹也其實似蓴子土人以和五味宋司馬光送張寺丞詩漢家尺五道置吏撫南夷欲使文翁化兼令孟獲知盤堆蒟醬實歌雜竹枝詞本草通鑑諸注及張志淳南園漫錄皆以蓴子為蒟醬

誤矣然萋子一名扶留而扶留有三種葦茷與焉見  
廣州記二者名亦相通但今所合檳榔食者的非茷  
耳

唐昭宗時南詔大旱二蕎不收飢民食烏昧不給至取  
草根木葉啖之烏昧者野燕麥也滇中霑益一路有  
之土人亦皆採食謂之鬼麥黔中尤多諸葛元聲曰  
古樂府田中燕麥何嘗可獲不知燕麥實有麥豈當  
時滇未通中國徒聞其名耶



釣藤藤也可以釀酒土人漬米麥於甕熟而著藤其中  
內注沸湯下燃微火主客執藤以吸按釣藤即千金  
藤主治霍亂及天行瘴氣善解諸毒其功似與檳榔  
同也

樹頭酒緬出其樹類椶櫚高五六尺結實大如掌緬人  
納麴甕中懸之實下劃實使汁入甕久則成酒其葉  
即貝葉也古以寫經今緬以書字

檳榔樹高十餘丈臨安廣南諸郡有之葉如芭蕉花如

金粟實如桃李土人四剖其房并實乾而貫之食者  
佐以石灰及扶留扶留萋子也似桑椹而綠味辛烈  
其功消宿食祛瘴癘故閩廣人亦噉之但閩廣人於  
檳榔去皮而噉實於萋噉葉而棄子此為異耳

荔枝臨安有二樹其一近北山寺大可合抱一在王參  
戎墅僅六寸徑耳熟以三月形味皆劣於閩廣又有  
龍眼一株味皆差似嶺南然此三樹之外土人百計  
種之不育也

閩廣有橄欖又有餘甘二物味相似而形迥別橄欖長大兩頭纖餘甘圓小而短樹亦不同滇有餘甘蜜而薦之土人亦謂之橄欖

大理賓川之黃柑色味甚佳大者如椀謂之獅頭柑舊志謂北勝州產非也自秋及春皆噉之香櫟尤大如瓜味勝閩中遠甚

猩猩果曲靖大理俱有之高數丈春花秋實狀如彈丸色如血故名味酸可食

雞窠菌屬以形似名永平產者最佳以六七月大雷雨  
後生沙土中或在松下林間鮮者多蟲間有毒出土  
一日即宜采過五日即腐采後過一日即香味俱盡  
所以為珍土人鹽而脯之熬液為油以代醬豉亦作  
糞集韻糞土菌也愛者鳥飛而縮其足之象雞取其  
形或作蟻誤也余按古人謂蕈為樹雞唐肅宗取作  
博子與張良娣戲者名或取此閩村谷中亦有之俗  
不知珍謂之雞肉菰又有白生牛乳菌柳菌松菌皆

其屬也而味不逮蒙榆山中亦產天花而土人不識  
謂之八擔柴

抹猛果也形如小猪夷語果曰抹猪曰猛又謂之抹母  
樹高大葉長如掌實與芭蕉相類而差短夏月熟味  
甘酸滇程記曰色類櫻桃形如橄欖

馬金囊其味似文官果而非文官果樹生而此蔓生也  
咀之飲水留甘不散一云傳惡瘡良

波羅蜜形如瓜短瓣攢生如椀其味黃者甘赤者酢潞

江及虧容夷地所產

大理上關和山之麓有樹高七八丈葉如桂花開白色  
每朶十二瓣以應月數遇閏輒多一瓣相傳仙人所  
種更無別本土人因其地名之曰和山花豫章鄧漢  
詩有云此花種來不知歲要識歲功驗花蒂霜葉青  
青雪作葩風前十二釵橫斜又云古來才士有棄置  
不信請看和山花

龍尾關以西山中產和木肌理膩白而甚鬆如南方杉

木然取以為器絕佳

古度臨安賓川山中俱有之記云不花而實實從皮中  
出大如安石榴色赤可食實中有如蒲梨者取之為  
粽數日不煮皆化成蟲如蟻有翼穿皮飛出俗謂之  
無花果然閩亦有無花果與記所載殊異楊慎古度  
賦曰有木詭容在句之東脩梯盤壤巨榦撐空閎華  
青帝垂實玄工蓐收傳紉屏翳敷紅子穿皮出房殊  
卉叢膚無纖蠹腹育飛蟲又曰烜比景灌蔭露果星

燭葉雲布榴榴相思為黨鄰平仲君遷為朋故君子識之是曰古度

滇中茶花甲於天下而會城內外尤勝其品七十有二  
冬春之交霰雪紛積而繁英艷質照耀庭除不可正  
視信尤物也豫章鄧漢稱其有十德焉艷而不妖一  
也壽經二三百年二也枝幹高踈大可合抱三也膚  
紋蒼黯若古雲氣尊壘四也枝條夭矯似麈尾龍形  
五也蟠根輪囷可几可枕六也豐葉如幄森沈蒙茂



七也性耐霜雪四序常青八也自開至落可歷數月  
九也折入餅中旬日顏色不變半含亦能自開十也  
為詩一百韻賞之其紫薇樹尤極繁盛皆高十數丈  
蔭數畝許公署尤多盡千百年物也自夏徂秋紺英  
照耀庭廡令人留連吟賞不忍捨去足稱二絕

地湧蓮高一二丈形類櫻櫚花如蓮亦名木蓮其小而  
蔓生者曰西番蓮雞足僧寮多植之

楚雄之響水坡產蘭甚繁楊慎稱其葉大而香遠實離

騷所稱可佩之真蘭莖葉皆香不獨花也

血樹似芭蕉枝葉如血根幹紫黑色高者七八尺惟臨  
安有之高第詩血樹真如血染成細看疑是赤龍精  
與君不惜連牀話試聽中宵風雨聲

念珠樹生大理之下關每結穗百有八顆相傳元時有  
日本僧四人同日坐化棄念珠於地而生

杜鵑俗謂之映山紅花色有十數種鮮麗殊甚家家種  
之盆盎又有燈籠花開如小燈籠紅色其葉近幹者

青近梢者赤又有蝶戲珠花以其形似名之宋蘇子  
由詩誰唱殘春蝶戀花一團粉翅亞枝斜美人欲向  
釵頭插又恐驚飛鬢上鴉

刺桐一名蒼梧花正赤色發密葉中傍照他物皆朱殷  
然如是者竟歲土人以其形似名曰鸚哥花又有疏  
亦名刺桐肥潤若芝志謂鮮可貳肉菹可經年

赤藤產緬甸朱色可為杖緬婦篋之以為腰飾唐元微  
之詩友親過瀝別車馬到江回惟有紅藤杖相隨萬

里來韓愈和虞部盧汀酬翰林錢徽赤藤杖歌赤藤  
為杖世未窺臺郎始攜自滇池滇王掃宮避使者跪  
進再拜語嗚呼繩橋柱過免傾墮性命造次蒙扶持  
途經百國皆莫識君臣聚觀逐旌麾共傳滇神出水  
獻赤龍拔鬚血淋漓又云羲和操火鞭暝到西極睡  
所遺幾重包裹自題署不以珍怪誇荒夷歸來奉贈  
同舍子浮光照手欲把疑空堂晝眠倚牖戶飛電著  
壁搜蛟螭南宮清深禁闌密唱和有類吹埙篪妍詞

麗句不可繼見寄聊且慰分司又裴夷直南詔朱藤  
杖詩六節南藤色似朱拄行堦砌勝人扶會須將入  
深山去倚看雲泉作老夫

楚雄山中產斑竹不規而圓節去逾尺作筍殊佳謂之  
天生筍記云雲南有實心竹文采斑駁殊可為器物  
即此是耶

火把花一名酒吊藤諸山俱有葉如杏大毒服無不立  
死者乾之亦可毒人滇中以六月廿五日火把節則

采此草束而燎之故名蓋欲絕其種類而蕃滋彌甚  
村氓自畫圖賴時見訟牘厲禁之不得也

安寧溫泉西岸有寺曰曹溪其中有曇花樹一株相傳  
自西域來者扶疎百尺綠葉白花移蘂他種終不復  
活其溫泉之側有無名樹僅四五尺蟠根石崖四時  
不彫亦不復長楊用脩遊其地有瑤草蟠千歲之語  
今距用脩又且百年矣而形質如故不知其為何木  
也

江川縣北二十里雙龍鄉有古樹不知其名初春茁葉  
自南則旱自北則雨自東自西則風雨時禾稼登四  
圍竝發則饑饉旱澇驗之無爽亦不知昉於何代也  
瑣梅草實也似桑椹而短味亦似之其採以三月又有  
草叢生山徑白花若薇子赤可啖四五月間飢者茹  
之謂之救軍糧

蒙自山中有仙草葉圓枝細採其葉乾之一二年煎以  
井泉或氣呵之復鮮茂如故此亦太和山萬年松之

屬也

南方草木狀興古有果名劉三月花七月熟其色黃其味酢又有豆蔻樹大如李二月花七八月熟曝乾剥食其核味辛香

梧實大如豆殼脆易剥不與他處類俗謂之山松子亦曰飛松

金剛纂木也出熨夷中北勝州亦有之青色狀如刺桐最毒土人種以編籬人莫敢觸滇程記云碧幹而蜩



芒孔雀食之其漿殺人 是已然以為草誤也

魏武帝四時食製曰滇池鯽魚至冬極美今滇河冬月  
產者最佳腹中白腴長六七寸若切麪然烹之其甚  
楊慎圖贊云滇池鯽魚冬月可薦中含腴白號水母  
綫北客乍餐以為麪纜魏武未嘗至滇豈亦得之傳  
聞耶樊綽南夷志蒙舍鯽魚重者五斤然未之見也  
西洱河產公魚一作魴又作弓僅如指長三寸許  
而味甚佳楊慎圖贊云西洱弓魚三寸其脩誰書以

公音是字謬又哂多子亦孔之羞慎嘗作戲語云大  
理公魚皆有子雲南和尚豈無兒張志淳曰工即江  
也古韻江亦音工陶淵明詩時雨濛濛平陸成江李  
翱別瀟山神文我亦何功路沿大江未知是否又上  
關石穴中八九月產油魚視魴更小而肥美過之炙  
則腴溢趙州產丁魚又小僅如釘耳諸河中蚌蜆充  
物人無捕者螺大如拳有黃有卵有腐秋夏之交盈  
肆亦奇錯也

細鱗魚產金沙江中大者三尺許肥甘異常魚龍尾闕  
渾水中亦有之而味不及也澂江江中產大頭魚尤  
佳江川又有窟窿魚二水相通而二魚不相往來見  
則交嚙

鷓鴣水鳥也出通海然非土產每歲以上已前來重陽  
前去來時以夜羣飛聲如雷其形金頂紅嘴色類鴉  
身似鷺烹之香脆柔美甲於水陸之鳥宦澂江者謠  
云窟窿不入湖大頭不入海十年萬里滇雲夢惟有

鶴鷄沒處買

滇程記云雲南百夷中有小孟貢江產鮓魚食之日御  
百婦故夷性極淫貴賤俱有數妻山中又產彎薑餌  
一刀圭終身斷絕人道土人以飼牡馬不宦也

異魚圖贊滇中尚有二魚今未之見聊志之一曰髮魚  
贊云髮魚帶髮形如婦人出於滇池肥白無鱗一曰  
竹頭鯢贊云張揖廣雅擲竹頭鯢滇池所饒亦名竹

丁烹以為鮓案酒薦馨

按此恐即丁魚

脆蛇一名片蛇產順寧大候山中長二尺許遇人輒自斷為三四人去復續乾之治惡疽腰以上用首以下用尾又治大麻風及痢

蟒蛇蟒屬四足長丈餘能吞豕鹿臨安諸郡及鎮康孟養有之冬春在山夏秋在水其膽治齒蠱解毒藥黃鱗為上黑者次之

蚺蛇產孟艮山中土人欲取之先以雞卜問諸神得吉兆則入麓求之蛇見人輒伏不動夷人語之曰中國

天子求爾膽爾可伏死否則吾亦不汝貰也蛇反背就戮今相傳云去膽復活者蓋謬說耳一蛇有三膽居頷下者以傳毒矢居腹間者入藥有病疽者以童便研一合服之又以傳患所頃刻而愈居尾者棄勿用

寰宇記云滇池黃津江有大蛇名曰青蔥好食人又有大蛇藏樹上伺鹿過繞之鹿死乃吞而繞樹其角骨皆鑽皮而出蛇亦殆死創差即更吞之又郡國志云

興古郡有大蛇長數丈尾有兩歧如鈎在水中以尾鈎取岸上人馬食之然今俱未之有聞也

元志烏蒙山峽多小黃蠅生毒蛇鱗甲中啣人痛癢搔之即成瘡惟以冷水沃之搽鹽即愈張志淳云永昌山中亦有問土人乃蛇糞中所生也

山呼似鸚鵡而差小樊之易馴宋蘇軾有咏山呼詩終日鎖筠籠回頭惜翠茸誰知聲嘑嘑亦自意重重夜宿煙生浦朝鳴日上峰故巢何處是鷹隼豈能容

鸚鵡滇山中甚衆僅值數十錢耳馴於隴產者教之甚易言語亦有黃者產百夷中永樂中嘗貢此金幼孜有黃鸚鵡賦至於鸚鵡趙州鳳山以千計能言又易於鸚鵡也

孔雀自惜其毛常巢深草中或依灌木時於杲日舒翼崖陽文采照耀山谷尾色最麗展之如屏故稱孔雀屏也性噉蛇虺或云亦與惡蛇交其膽毒人立死夷人取其卵使家雞伏之可畜但不甚文耳華陽國志



云雲南郡孔雀常以二月來翔月餘而去今殊不然  
朱東器楮談云緬甸有鳥四足而肉翅其大如鵝其鳴  
似鶴能飛而不能遠其雛胎生飛行則負雛于背不  
踐稼穡不食生蟲殺之者不祥

唐咸亨中永昌之西野桑生石上其材上屈西向而下  
直南詔取以為弓不筋漆而利名曰螟弓今鶴慶產  
巖桑猓猓取以為弓發矢千步其遺種也

越睽之西產善馬世稱越睽駿始生若羔歲中以紐莎

縻飲之以米潘七年可御日馳數百里至宋建炎紹  
興常以錦綵買馬於大理范成大桂海虞衡志云大  
理馬為西南蕃之最今滇絕無馬惟緬產者稍為雄  
駿次則昆明宜良陸涼世稱西馬黔國有牧場焉其  
馬自生自育一牡九牝隨向飲齧他牡至輒蹄之非  
牧人不敢近也

博物志云雲南郡出茶首其音蔡茂是兩頭鹿也其腹  
中胎可治蛇虺毒土人常以四月中取之按後漢書

兩頭鹿見雲南其即是耶然亦不恆有矣

象產緬甸之擺古距永昌可四千餘里莽苗居焉得象馴而習之以供戰陳其梟者直千金貢象可三百金景東土官常畜以備宣索

常璩南中志云永昌有貊獸能食鐵有猩猩能人言其血可以染朱罽

博物志云越嶲有牛稍割取肉經日復生釋法盛歷國傳亦云天竺有稍割牛十日一割不便因病

牦牛產刺次香羅瓦魯諸夷地毛可為帽為纓莊子所謂大若垂天之雲而不能捕鼠是已

騰衝有地名緬箐常有二獸出見大如橐駝毛色碧綠獅首象蹄牛尾有齒無牙頂戴肉角見人則伏地而鳴土人誤殺其一暴露數日都不臭腐父老云此獸見則有兵

史記稱苻馬熨僮髦牛髦即牦也熨僮信實而忠於其主至死不變人得此僮為僕甚為利益今之熨夷獍

獼樂戰鬪詎堪畜養哉

百夷雞產永昌諸蠻地視家雞足短而善鳴晝夜無時  
音穉若鷓鴣然雌者亦鳴又夏秋之交生秧田中者  
曰秧雞小而黠不可捕其五色俱備日中吐綬者曰  
錦雞

薄辰大如狐而人立手足類熊亦曰熊弟炙之甚美福  
羅似猴而毛赤可為裘性嗜蜜土人置蜜罍之出鶴  
慶山谷中

哈芙蓉夷產也以鶯粟汁和草烏合成之其精者為鴉片價埒黃金可療泄痢風蟲諸症尤能堅陽不泄房中之術多用之然亦有大毒滇人忿爭者往往吞之即斃

百鵲膽一名蘆薈亦夷地草滴脂淚而成凝黑若飴味苦甚故名也又謂之鴉膽亦名黑藥治小兒五疳最良解已豆毒及頭癬齒墮服過七分者死

阿魏亦出者樂甸相傳大樹凝脂下洒著物即化市之

鬻者皆其化也故諺曰阿魏無真此物極臭而能止  
臭殺蟲消痞辟瘟治瘡諸鬼物畏之一曰合昔泥夷  
人以醃羊肉甚美

噯叭香不知何物所製以其國名氣味稍似阿魏可和  
諸香焚之昔人有賃凶宅者既知其凶不得便徙索  
中有噯叭香取焚之數夕中夜聞鬼語曰彼焚何物  
令我頭痛不堪亟避之翌日宅遂清吉無患

香又有白檀甘檀紫檀青木降真諸種而麝為之最然

土人不知製香售之估客而已焚供皆劈檀榆之屬  
焚之

緬茄枝葉皆類家茄結實似荔枝核而有蒂土人雕刻  
其上而繫之拭眼去翳亦解瘡毒緬豆者如豆蔓生  
子大如栗斑文點點咀之傳瘡良然性迅惡誤服之  
吐瀉致死又有神黃豆調水飲能解小兒痘毒然亦  
不甚驗也

白龍鬚草名出蒙化永昌間有大毒祛風發汗軟人肌



骨治痿痺最效然每服止可二三分至五分極矣須以  
無灰酒嚥之或與烏骨雞同煮服後仍坐密室三日不  
可風溼人不甚用惟女子洗足用之云骨軟易纏也  
蛤蚧沅江山中有之穴於枯樹其鳴雄曰蛤雌曰蚧聲  
相和然後合捕之相抱至死不脫房中藥用之

雪蛆產麗江之雪山形如竹魴土人於積雪中捕得臠  
食之云愈心腹熱疾間有脯至鶴慶鬻者然不恒有  
也

仙人骨出楚雄之呂合驛相傳南詔時張王二生遇呂  
仙於此王得度上昇張不能從憤而死埋骨山中化為  
石瑩徹如水晶傳一切瘡瘍立愈詳見雜畧

蒙山產草烏最毒弘治間有周朱二醫採以釀酒比熟  
周將以進要人夕先嘗之迨曉斃矣朱則邀道侶四  
人共飲二人先至飲之主客俱斃座上二人以後至  
得免輒爨諸夷煉以傳矢中人畜無不立死者讎家  
取置衣領及冠巾中遣人著之即腦裂頭斷然其方

秘不傳也

人參出姚州及大理山中性視遼產燥烈不可服土人亦不知製也其小而脩者曰竹節參性彌緩

高河菜似芹菹之良出點蒼之高河故名相傳云採者不可有聲聲則致雷雨

語云金生麗水今麗江其地也其江曰金沙源出吐蕃經鐵橋寶山永寧北勝以達東川江許沙泥金麩雜之貧民淘而煨焉日僅分文售蜀佑轉諸四方其稅

屬之土府漢不得有也朝廷歲責滇賦金五千其直可四萬緡皆蜀估有力者先期受直於官而走四遠哀入之間有逃且死者累及姻族桁楊纍纍至於黔巫瘴癘十死一生又不具論也永平山中間有金沙色更赤而利甚微

麗江之金不止沙中又有瓜子羊頭等金大或如指產山谷中先以牛犁之俟雨後即出土夷人拾之納於土官然近亦絕無矣

博物志補云金一也產于金沙江者紫色光瑩產於麗江者色赤而沾垢膩銀一也產於梁王山者白瑩而有茶花黃點撲之有聲琤琤然產於細花明光諸場者微有鉛色撲之其聲黯麗江府產金尤多每雨後其金散拾如豆如棗大者如拳破之中空有水亦有包石子者銀則穴地數十丈取鑛石鍊之其所產最甚者莫如磨乃場

滇銀鑛共二十有三所置場委官以征其課歲約二萬

緡然脈有盛衰課隨盈縮又有銅鑛十九所鉛鑛四所碌鑛一所按禹貢梁州貢鐵銀鏤漢書地理注銀出朱提屬寧州部其來久矣錫則臨安者最佳上者為芭蕉葉扣之聲如銅鐵其白如銀作器殊良出市者雜以鉛遂頓減價

瑪瑙產永昌之哀牢山紅白二色其相間者謂之纏絲又有土瑪瑙其色微紅而堅不足近遼東瑪瑙盛行而滇產廢矣

寶石產猛密木邦及永平以西皆有之生山坳溪澗注  
水之所謂之寶井色類不一值亦懸絕蔚藍色而重  
數兩者即逾千金然亦不多得也其雜碎者為寶砂  
傳聞先朝時寶井得一寶石中有蒼蠅二頭置几上  
能辟蠅鎮守中官聞之以三百金購去

琥珀產緬蠻諸西夷地相傳松脂入地千年所化又云  
楓木精液凝成未知信否但其中亦有蚊蟻等形想  
不誣也其直火珀及杏紅為上血珀金珀次之蠟珀

最下又其下者可供藥餌而已宋劉裕南征時寧州獻琥珀枕裕大悅以其治金創碎以分將士今重三五兩以上者即不可多得矣萬曆甲午有詔下藩司取二百斤一時騷然惟永昌郡帑舊貯二十餘斤悉以上供搜括數年竟不能充其數而止民破家者無算

催生石亦出西陲山下色翠而間以白作酒器飲之云能治產難然不甚驗至于紫英雲母石青深綠石黃



地所時有不足珍也其他如水精綠玉墨玉碧瑱古  
喇錦西洋布孩兒茶之屬皆流裔自猛密迤西數千  
里而至者非滇產也而為滇病最甚然後漢書已稱  
永昌出金銀光珠琥珀水晶琉璃軻蟲蚌珠孔雀翡  
翠犀象猩猩貊獸以今較之又不足逮矣

南中志云永昌產光珠有光珠穴呂凱子祥太康中獻  
光珠五百斤又云瀾滄水有珊瑚今俱絕無

文石出點蒼山之北麓白質黑章膩若截肪琢為屏障

其最佳者蒼素分明山川遠近雲林晻曖若天生圖  
畫不脛而走四方好事者爭購之相傳李德裕平泉  
莊醒酒石即此也然贗作者亦復不少其作人物驢  
馬以媚俗眼者皆饒鼎耳大內鼎建不時採取頗為  
民累嘉靖辛酉詔取四尺以上至七尺者五十巡撫  
蔣宗魯奏罷之萬厯癸巳詔取鳳凰石百餘皆擇石  
中有花草鸞鶴形者名之然僅三四尺而止閩鄧原  
岳點蒼山石歌點蒼山頭日吐雲紫光白氣長氤氲

却產奇石作屏障終朝開採徒紛紛頻年貢入長安  
道濃淡之間山色好君王便作圖畫看豈識閭閻刻  
肝腦朝鑿暮解苦不休詔書昨下仍苛求前運後運  
相結束道傍嘆息聲啾啾耳目之翫豈少此十夫供  
役九夫死從來尤物是禍胎吁嗟乎當時作俑者誰  
子

永昌人善造料絲初由鎮守內使有之珍秘殊甚永昌  
人試效為及成反精於彼又長大數倍其法以紫石

英赭石合饒磁諸料煨之於烈火中抽其絲織以成片加之絲繪以為燈屏故曰料絲李文正公以為絲繇誤矣又以瑪瑙合紫石粉而煨之以成碁子瑩潤細膩甲于天下

滇苦無茗非其地不產也土人不得採取製造之方即成而不知烹瀹之節猶無茗也昆明之秦華其雷聲初動者色香不下松蘿但揉不勻細耳點蒼感通寺之產過之值亦不廬士庶所用皆普茶也蒸而成團瀹

作草氣差勝飲水耳

滇水皆以海名而味不鹹鹽皆自井中出也楚雄有黑井白石泉井巖泉井東井琅井阿陋井猴井姚安有白羊井白石谷井觀音井舊井橋井界井中井灰井尾井阿拜小井大理有諾鄧井大井山井天耳井師井順蓋井石門井洛馬井石縫井河邊井天生井安寧州有大井石井河中井大界井新井鶴慶有彌沙井橋後井武定有只舊井草起井其餘小井無數皆

熬波成鹽迤西者圓如瓜迤東者如巖石惟順盪自  
巖穴湧出有池盛之熬作楮形最潔白無滓此泉初  
出甚盛日百餘斛所司遣官驗眎土人懼其增課也  
以木石壅其源令緩既去泉流遂微矣又威遠州莫  
蒙寨有河汲而澆諸火上即成鹽

氍者織羊毛為之其細如絨堅厚如氍染成五色謂之  
縹氍永昌麗江人能為之其在廣西者曰氍氍本一  
種也氍則諸郡皆為之而鄧川最良然亦麤甚桂海

虞衡志云蠻氊以大理為最蠻人晝披夜卧無貴賤人有一番

布以永昌之細布為佳有千扣者其次有桐花布竹布井口布火麻布莎羅布象眼布而洱海紅花膏染成最艷謂之洱紅永昌善造青謂之金齒青其直獨倍他所南中志云有闌干細布闌干獠言紵也文如綾錦華嶠後漢書云哀牢夷之染綵細布織成文章如綾錦有梧桐木華績以為布幅廣五尺潔白不受垢污

先以覆亡人而後服之今西洋布豈其遺種耶

南詔通紀云兜羅綿出金齒木邦甸又有火草布草葉  
三四寸蹋地而生葉背有綿取其端而抽之成絲織  
以為布寬七寸許以為可以為燧取火故曰火草然  
不知其何所出也

紙出大理蒸竹及穀皮為之其水必用藥師井者良膩  
而不燥謂之青抄可以久藏但差狹小耳其用米粉  
抄者鮮白有餘而善腐蠹字畫易脫若華亭粉箋然



其製稍長湏無東紙以此代之

蘇易簡曰雞足山古松心燒烟為墨最佳今大理工人取松煙膠和入丹砂雜以腦麝硫黃為之雖不及歛墨之良較之他處稍勝然歛墨用油煙非古法也曹子建詩云墨出青松煙仇池筆記真松煤遠煙自有龍麝氣則湏猶有古之遺法耶但持以作字一點如漆不能不遜新安耳

桂海虞衡志云蠻甲惟大理國最工甲冑皆用象皮冑

背各一大片如龜殼堅厚與鐵等又聯掇小皮片為披膊護項之屬製如中國鐵甲葉皆朱之兜鍪及甲身內外悉朱地間黃黑漆作百花蟲獸之文如世所用犀毗器極工妙又以小白貝累累絡甲縫又裝兜鍪疑猶傳古貝冑朱綬遺製云

又云雲南刀即大理所作鐵青黑沈沈不鏽南人最貴之以象皮為鞘朱之上亦畫犀毗花文一鞘兩室各函一刀靶以皮條纏束貴人以金銀絲今大理無刀

惟鶴慶刀劍馳譽四方其法取古宗鐵濯以鶴川水  
利可剗犀柔者可以繞腹然古宗鐵不易得貿之四  
遠者皆凡鐵耳而以金銀裝飾取媚無當於用也書  
刀則新興安寧者良

緬鈴相傳鵬精也鵬性淫毒一出諸牝悉避去遇蠻婦  
輒啄而求合土人束草衣絳衣簪花其上鵬矚之不  
置精溢衣上跳躍不休采之裹以重金大僅如豆嵌  
之於勢以御婦人得氣愈動然秘不外售殺夷取之

始得滇人僞者以金作蒺藜形裹而搖之亦躍但彼  
不搖自鳴耳一云名太極丸

景東蒙化之間夷民能織斑絲蓋亦土蠶之繭織成紫  
白相間如記所稱吉貝者劉禹錫詩蠻衣斑斕布其  
謂是耶然幅狹而短不堪作衣耳

滇畧卷三